

法住智：(一)指如實知見無明、行等十二支緣生法之智。〔雜阿含經卷十四〕(二)依佛所教之理法，而設法門解說之智。〔解深密經卷一心意識相品〕(三)依教法而生起之智，即指凡夫之智慧。〔瑜伽師地論卷十〕。

法住智指觀察諸法之因果緣起之智；涅槃智指悟入諸法生滅無常、法性空寂之智。法住智在知諸法生起之因，依之而悟入流轉門之緣起理；涅槃智在知諸法寂滅之理，依之可證還滅門之緣起理。而悟入的程序是：『先得法住智，后得涅槃智』。

◎附一：《成實論》卷十六〈五智品〉(摘錄)

五智：法住智、泥洹智、無諍智、願智、邊際智。知諸法生起名法住智。如生緣老死，乃至無明緣行。以有佛無佛、此性常住，故曰法住智。此法滅名泥洹智。如生滅故老死滅，乃至無明滅故諸行滅。問曰：『若爾者泥洹智亦名法住智，所以者何？若有佛無佛，是性亦常住故。』答曰：『諸法盡滅名為泥洹，是盡滅中有何法住。』

◎附二：《大毗婆沙論》卷一〇六(摘錄)

法住智是知因智，故知三界下中上果法所住因故，彼智即此四智所攝，謂法類世俗集智。涅槃智是知滅智，彼智即此四智所攝，謂法類世俗滅智。

五出性

五出要界：欲出要，瞋恚出要，嫉妬出要，色出要，身見出要。參見《長阿含經》卷 8 (9 經)《眾集經》(大正 1, 51b27-c3)。

阿難。我本為汝說五出要界。云何為五。阿難。多聞聖弟子極重善觀欲。彼因極重善觀欲故。心便不向欲。不樂欲。不近欲。不信解欲。若欲心生。即時融消焦縮。轉還不得舒張。捨離不住欲。穢惡厭患欲。阿難。猶如雞毛及筋。持著火中。即時融消焦縮。轉還不得舒張。阿難。多聞聖弟子亦復如是極重善觀欲。彼因極重善觀欲故。心便不向欲不樂欲。不近欲不信解欲。若欲心生。即時融消焦縮。轉還不得舒張。捨離不住欲。穢惡厭患欲。觀無欲。心向無欲。樂無欲。近無欲。信解無欲。心無礙。心無濁。心得樂。能致樂。遠離一切欲。及因欲生諸漏煩熱憂感。解彼脫彼。復解脫彼。彼不復受此覺。謂覺因欲生。如是欲出要。阿難。是謂第一出要界。

復次。阿難。多聞聖弟子極重善觀恚。彼因極重善觀恚故。心便不向恚。不樂恚。不近恚。不信解恚。若恚心生。即時融消焦縮。轉還不得舒張。捨離不住恚。穢惡厭患恚。(中略)遠離一切恚。及因恚生諸

漏煩熱憂感。解彼脫彼。復解脫彼。彼不復受此覺。謂覺因恚生。如是恚出要。阿難。是謂第二出要界。

復次。阿難。多聞聖弟子極重善觀害。彼因極重善觀害故。心便不向害。不樂害。不近害。不信解害。若害心生。即時融消焦縮。轉還不得舒張。捨離不住害。穢惡厭患害。(中略)遠離一切害。及因害生諸漏煩熱憂感。解彼脫彼。復解脫彼。彼不復受此覺。謂覺因害生。如是害出要。阿難。是謂第三出要界。

復次。阿難。多聞聖弟子極重善觀色。彼因極重善觀色故。心便不向色。不樂色。不近色。不信解色。若色心生。即時融消焦縮。轉還不得舒張。捨離不住色。穢惡厭患色。(中略)遠離一切色。及因色生諸漏煩熱憂感。解彼脫彼。復解脫彼。彼不復受此覺。謂覺因色生。如是色出要。阿難。是謂第四出要界。

復次。阿難。多聞聖弟子極重善觀己身。彼因極重善觀己身故。心便不向己身。不樂己身。不近己身。不信解己身。若己身心生。即時融消焦縮。轉還不得舒張。捨離不住己身。穢惡厭患己身。(中略)遠離一切己身。及因己身生諸漏煩熱憂感。解彼脫彼。復解脫彼。彼不復受此覺。謂覺因己身生。如是己身出要。阿難。是謂第五出要界。